



Bruno Claus po sa legrar dal resultat da Martin Schmid.

FOTOS G. N. STIGIER



Andrea Felix, il president da la pbd, po sa legrar dal mandat da Duri Campell.

Ella vegn a represchentar il pievel che trametta ella a Berna

Reacziuns dals presidents e represchentants da las partidas

DAD AUGUSTIN BEELI / ANR

Las elecziuns naziunales dad ier han purtà in resultat che è per insaquants Grischuns ina surpraisa. Da nov represchentan quater cussegliers naziunals dal Grischun ed ina represchentanta dal chantun Turitg la chombra gronda a Berna. L'anr ha discuri cun ils presidents e represchentants da las partidas.

«Igl è ina catastrofa. Il Grischun trametta a Berna ina represchentanta da l'ala turitgaisa da la pps. Igl è in signal negativ per l'entira Svizra. La dretga turitgaisa è cunter ils flaiVELS e s'engascha sulettamain per l'economia libra: Quai di il president da la ps dal Grischun, *Jon Pult*. En il discurs cun l'anr è el sa mussà fitg trumpà cun l'elecziun ch'il pievel grischun ha fatg ier. Sia situaziun na fa betg surstar, pertge las partidas burguais occupan da nov sis dals set mandats en il parlament naziunal a Berna. Sco ils davos quatter onns va *Silva Semadeni* era ils proxims quatter onns a Berna. Ella è da la vart cumplet cuntraria da sia nova collega *Magdalena Martullo-Blocher*. Las dispitas internas da la delegaziun grischuna en programadas. Jon Pult po dentant betg zuppar ses plaschair ch'igl è gartegià da defender il mandat dals socialdemocrats. Cun 14 863 vuschs haja *Silva Semadeni* fatg in resultat respectabel, di el. Na fiss Jon Pult betg sez i questa giada gugent a Berna, damai ch'el è giuven e plain dinamica? «Quest tema avain nus tractà democraticamain en nossa partida», è ses sulet comentari.

Reponderar la strategia futura

Ils sperdidiers da las elecziuns en il Grischun en ils liberaldemocrats, almain en il cussegl naziunal. Tge han els fatg fallà

ch'els n'han puspè betg cuntanschì la finamira? «I constat, nus n'avain betg gudagnà il mandat che nus avevan giavischà en il cussegl naziunal, dentant èsi tuttina gartegià da far 1,4 pertschient dapli vuschs», di *Bruno Claus*, il president dals liberaldemocrats. Il resultat saja fitg stgars, e quai dettia anim dad analisar ils motivs. «Mia gliud ha prestà fitg buna lavur», accentuescha Bruno Claus. Il temp da spetgar avant ch'ils resultats eran clers era el fitg nervus ed ha spetgà ditg cun responder las dumondas dals schurnalists.

Quai ch'el accentuescha er è il resultat excellent da cusseglier dals chantuns *Martin Schmid*. «Quai è per mai ina gronda satisfaziun», concluda Bruno Claus. «Ils chaus n'ans mancan betg, nus stuain sulet reponderar nossa strategia», finescha il president dals liberals grischuns.

Silvia Casutt-Derungs, la vicepresidenta da la pcd dal Grischun, ha prendi posiziun per il president *Stefan Engler*. «Nossa finamira era da daventar la segund-ferma partida», analysescha ella. Ella zuppa dentant betg ses pli grond plaschair: «Nies *Martin Candinas* ha fatg in resultat sensaziunal», di ella cun luschezia. Cun 21 782 vuschs è il represchentant da la pcd vegnì reelegi cun il segund-meglier resultat. In zichel loscha è *Silvia Casutt* era da ses agen resultat da 6143 vuschs. Quai che la vicepresidenta deplorascha in pau è che la pcd ha manchentà per pauc la limita ch'ins aveva en mira da 17 pertschient. Cun 16,8 pertschient è il resultat dentant quasi cuntanschì.

Ils purs en represchentads vinavant

Per la pbd, la Partida burgais-democraica, è il resultat tuttina legravel, malgrà ch'ella ha perdi 5,9 pertschient da las vuschs. *Gi-*

an Michael, il schef da la fracziun, pren posiziun: «Nus avain adina gi l'intenziun da tegnair noss mandat. E quai è ussa gartegià.» Grazia al resultat da 12 570 vuschs e grazia a la colliaziun da glista è *Duri Campell* il fortunà. El stumpla *Josias F. Gasser* or dal cussegl naziunal. *Josias Gasser*, il verd-liberal, ha fatg 12 990 vuschs, *Duri Campell* 400 damain. Per *Gian Michael* èsi er ina gronda fortuna ch'il mandat dal pur *Hansjörg Hassler* resta ad in pur. «Quai è vairamain fantastico», concluda el. *Duri Campell* vegn a represchentar vinavant ils interess agricols en la chombra gronda a Berna.

Christian Stricker, il president dals verd-liberals, ha temi davent da l'entschatta ch'i na possa betg tanscher da defender il sez da *Josias F. Gasser*. «Ussa duessan nus cumenzar cun tractativas da fusiun cun il chantun Turitg», di el cun tun amar. I saja betg uschia che tut ils Grischuns hajan votà per la pps e la dretga, «igl è dentant uss in fatg che nus avain sulettamain quater represchentants grischuns en il cussegl naziunal.» Entant ch'il Grischun na conuscha quasi betg pli ina posiziun verd-liberala è quai auter en las citads ed aglomeraziuns da la Bassa. Co ch'i va vinavant cun sia partida na sa el anc betg dir.

Andrea Davaz è il victur dal di ensem cun ses president *Heinz Brand*. La cursa principala ha dentant ina dunna fatg. Cun bunamain 19 000 vuschs haja la candidata favorita da la glista mussà ch'els Grischuns giavischian ina midada da la politica. I dovria ina *Magdalena Martullo-Blocher* che s'engaschia energicamain per questa midada, è *Andrea Davaz* s'exprimi. «Il pievel Grischun ha elegi ella, quai è cumbinà cun ina responsabladad», concluda el.



Silvia Casutt, la vicepresidenta, ha dus chavals a Berna: Martin Candinas e Stefan Engler.



Christian Stricker propoza da fusiunar cun il chantun Turitg.



Gian Michael, deputà a Donat, ha in successur per Hansjörg Hassler, il represchentant dals purs.

Jon Pult è confortà che *Silva Semadeni* po restar a Berna.